

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA NOVEMA 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

FAALAUILOA ALOAIA LE TUSI PAIA TOKELAU



Failautusi Aoao, Failautusi Komiti Au Toeaina ma le au malaga mai EFKS, ma sui o le EFKT & Malo Tokelau, i le Aso Sa na faalauiloa aloaia ai le Tusi Paia Tokelau, i Tokelau.

FAAPAIA GALUEGA EFKS FUSI SAOLUAFATA



Maota fou Faafeagaiga, Maota fou o le Galuega, & Auala fou, EFKS FUSI, APIA SASA'E

O LE FAASINO UPU

1. O LE LAUGA	2
2. O LE TUSI PAIA TOKELAU	5
3. EFKS FUSI SAOLUAFATA	6
4. FAAU'UGA MALUA 2025	7
5. MASINA O FAIGA TAULAGA	7
6. O LE PEROFETA MULIMULI	8
7. AU FAAU'U MALUA 2025	12
8. TUSI SU'EGA MALUA 2026	13
9. O E UA FAI I LAGI FOLAUGA	13

i. Rosa Eletise Suluvala

ii. Aokuso Jr. Lee FS

iii. Tuimavave Tafagamanu Eneliko Masoe

O LE LAUGA

TUSI FAITAU: ISAIA 8: 1-8.

MATUA: ISAIA 8: 5-7. “5 Ua toe fetalai mai le Alii ia te a’u, ua fa’apea mai, 6 Ona ua te’ena e lenei nu’u o le vai o Seloā ua tafe lemu, ma ua fiafia ia Resina ma le atalii o Remalia; 7 o le mea lea, fa’auta, e au mai ai e le Alii i luga ia te i latou o le vai o le vaitafe, e malosi ma le tele lava, o le tupu o Asuria lea, ma lona mamalu uma; e alu a’e ia i ona alavai uma, e lofia foi ona auvai uma.”

MANATU AUTU: ‘AUA NE’I TE’ENA LE TO’AFILEMU O LE ATUA, INA NE’I TO LONA FUASOU MALOFIAAI OUTOU.

A toe fa’aupu le autu e mafai ona fa’apea: ‘Aua le va’ ai tuālafo pe manatu fa’atauva’a i le Atua, nei silata’imatagi pe to’asa mai o Ia. O se fe’au ua fia fa’aagiagia e lenei fa’asoa fa’aleagaga, o se toe fa’atepa lea o le ‘au fa’atuatua o loo feagai lo latou ola molimau ma tofotofoga, ina ia ‘aua le si’ilima gofie ma fa’asesēina vave pe a fetaia’i ma puapuaga e fa’asagatauina lona vala’auina, a e ia a’oa’oina mai le tala fa’asolopito o vaitau ua mavae, ona toto’a ai lea o lana va’ ai ma folau magafagafa ai mo le lumana’i. Pe a fesiligia po o le a lea tala fa’asolopito? A tatou va’ ai ia Isaraelu le nu’u filifilia o le Atua, e le tineia le tu’utu’u taliga ma le tu’utu’u gutu o tala i mea mata’utia na faia e le Atua aua lo latou fa’asa’olotoina mai le pologa i Aikupito. O tala o lo latou manumalo i mea faigata ona o le Atua na te le’i tu’ulafoa’iina i latou. E manino i le Tusi Pa’ia le tala’aga o le Nu’u filifilia o le Atua, e leai lava se isi

malosi na mafaia ai ona fa’ato’ilalo puapuaga uma, na o le mana silisiliese o le Atua na sosofa ai ma fa’ato’ilaloina ai mea uma na fa’alavelaveina ai le aga atu o ona tagata fa’atuatua ina ia fa’ataunu’uina lona finagalo.

O le tofiga o le nu’u o le Atua, ia fa’aailoa atu lona finagalo i le lalolagi uma lava. O lona finagalo tutasi (intentional will of God), o lona finagalo taupaopao (circumstantial will of God) ma lona finagalo aoao fa’avavau (the ultimate will of God), e lē fa’ataumatatao pe pao e se tasi. A lalagi ona tautapa fa’alupea o Ia e pei o auma o le vasa fatitū souā e lē lomilomiā, e le mafai ona fa’agalumutua ina ia malū ona peau lagalaga. O le tai tafola e lē fa’auāloloina e matagi alovale, o le peau to’a e lē sapotuvaleina e se mea e tasi. O le utaga e lē popose e le matemateina pe tau masina ma se tasi. O lona uiga, e le masalomia, e le fa’atusalia, e le fesiligia lava le malosi ma le moni o le Atua e tu mo ona tagata fa’atuatua. A e aisea la e tu masalo ai ma autago se lototele o Isaraelu e fesaga’i ai ma mea faigata?

E le toe tau fa’amaninoina ia Isaraelu lona ave’eseina mai le pologa nai Aikupito, le malo pito i lotovii i le lalolagi uma, a e faimai na teva Nailusi le atua o le Naila ma aluese ina ua fa’atafetoto atoa e le Atua le Naila. Ioe, na to i ai le fuasou o le Atua ia Aikupito. A e o le o ese mai Aikupito fai mai le gaga sagisagi a le fatupese Eperu i lana Salamo: *Na sola le sami ia te oe le Atua. A e muamua atu upu ta’utino a Ra’ava: Na matou fa’alogo i mea na faia e lo outou Atua i nu’u na outou ui mai ai, na fa’amateina le Sami Ulaula a e outou sopo’ia mai, ona liu suavaia ai lea o matou loto, ua le toe lava se malosi i totonu ia te i matou.*

A na ola mai Ra’ava i ia taimi ua a’oa’i le nu’u i lo latou fa’atamala. Oi, e ta’alili mai tala, a e va’ ai i loto ina matuā palavivivi? O le upu a Isaia, ‘aua le fefefe ia Resina ma Remalia ua na o ni i’u aulama e na ona pupusa, pupusa a uma. A e talofa e, ua oso le fa’ama’alili ma ua afu malulu A’asa le tupu fa’atamala. E apoapoa’i atu le perofeta ia fa’atuatua i le i ai o le Atua ma i latou, a e peita’i ua suluola ia Asuria ma ana ‘au.

Ona aumai loa lea o le fetalaiaga a le Atua ia Isaia ua fa’apea mai le matua: *“Ona ua te’ena e lenei nu’u o le vai o Seloā ua tafe lemu, a ua fiafia ia Resina ma le atalii o Remalia. O le vai o Seloā o lona uiga o le auina (sent) sa fausiaina i taimi o le Tupu o*

Esekia, ma sa faia o se alavai (aqueduct) o lona fa'amoemoe e auina pe fa'atafe atu ai le vai mai le vaipuna o Kaiona, ona molimoli atu lea e le Selo a i lona tafetafelemu le vai mo le malumalu i Ierusalem a ma le 'a'ai atoa. O galugalula o le vai o Selo a e le so'ona tatafe malos i, a e fafatimālie faalaufofola ma tafetafelemu lava. Peita'i e ui ina tafelemu le Selo a, a e na matua lava telē lena e utufia ai ma fa'amalieina ai mo'omiaga mo le 'a'ai atoa o Ierusalem a, aemaise ai o le malumalu mo osiga taulaga ma tu esee se uma o le malumalu.

O le fe'au loloto o le tafelemu o Selo a, ua fa'ailoa mai ai le ata o le afio oololomae'e, e lē gaoiā o le Atua Silisiliese, o Ia o le punāvaiola e utugalala a'i ma malie a'i le tagata ua fa'atuatua moni ia te ia. O le tagata Isaraelu e fa'atuatua moni, e fai mona ta'elega Selo a e tulitau fa'a'i, e tulimagalo a'i ma inumalie a'i, ona fa'atumulia lea i le to'afilemu e lē gāe'evale gofie ai pe a taia i faigata, aua ua malu tūtūgamālie lona faamoemoe i le paolo o Lē e ona le malos i uma lava.

Fa'auta i le tumuia o le la'oai a Isaraelu i le fa'atautamaola a le Atua Fa'aola, a e talofa, ua le fa'atagisia se tafelemu fa'aleAtua e le nu'u, a ua naunau ia telelise ona fa'atumuina lo latou fefevavale i le malos i ma le televave fa'aletagata. Ua le manana'o e tau ina fa'atulaga o matu'ua le tai, a e ua naunau ia su'e fuefue mai mo latou loto ua le mautonu. A lea ua fetalai le Atua, ua lelei o le a tali lo outou mana'o, o le a sau Asuria e pei ona outou fa'atagisia. Na to le fuasou o le Atua auā faimai le tala fa'asolopito, na o'o lava ina fa'aumatia e Asuria e le gata o Isaraelu ma Suria, a e na o'o mai lava ia Iuta lona mata'utia, ma ua lofia ai uma lava i latou. Mulimuli ane, o le malos i lava lena o Asuria na i'u ai ina fa'atafeaina ai Isaraelu i le TLM 722, a e avea Iuta ma pologa e togi lafoga ma auauna ia Asuria. Ua tagi fa'amali'o Isaia le perofeta auā o lea o le a mamulu le fa'apalepale o le Atua ia Iuta ma Isaraelu, o le a tatā i tua o Fatutoa la'i o Puava. Auā e lē gata ina lē fa'alogo le tupu o Iuta ia Isaia ma lana fa'aututo'a, a e o Isaraelu foi ia ua lē maunofa e faipa'aga ia Suria. O le 'autasiga a 'au a Suria ma Isaraelu na ala ona tupu ina ia fa'aagaaga mo Asuria ua malos i mai matu, a e fa'ata'ita'i lo la malos i i le fa'asaga atu ia Iuta. E pei o fa'ata'ita'iga o meatau malolosi a Farani e fa'aagaaga mo isi atunu'u, a e fa'ata'ita'i muamua i atumotu o Mururoa Island i le Pasefika.

O upu a Isaia mo le nu'u, ia fa'atuatua o lo'o tumau le i ai o le Atua mo i latou. A e paga lea, ua 'amia e le tupu o Iuta le fesoasoani mai Asuria ina ua fefe ia Suria ma Isaraelu. Ona fa'aaogaina ai lea e le perofeta o upu taua o lo'o i la tatou matua: Ona ua te'ena e lenei nu'u o le vai o Selo a ua tafelemu. Faimai se tasi alagaupu a Samoa: O lo'o faautuutumālū le salefu tumoe nai Malaetele ma Malaevavau. O le salefu o le fa'amatua po o le ta'inafi a le lo'omatua ma le toea'ina e foliga mai ua pe, a e leai o loo ola lava ma 'a'asa ola. A fia iloa o ola le salefu ona feula lea, pe tu'u foi i ai le lima ona mu lea. Ua fa'atusaina ai le malo o le Tuimanu'a nai Malaetele ma Malaevavau e ui ina manatu tagata ua vaivai ma ua leai, a e fai mai e olaola lava ma e lē tofotofoina e se tasi.

O foliga na o le fe'au a Isaia le perofeta, ne'i mao ma tofotofo ona e va'ai tualafo i le Atua, a e afaina ma solipalaina ai i tatou e mea ua tatou fa'atauaina ma fa'amumuaina. Aua le pisaō ma felagaa'i solo, o loo faatalaloa le Keriso i le taumuli e na te ulitoniua lo ta sa folau i atuvasa souā. O lo'o tapua'i fa'alologo e pei o le upu i le Fe'epo le matua o le Malietoa. E le logonoa le Atua o le a e le tapā ai i le taimi o le luluti o matagivale. A e o ai tatou e faafia-tofāoo ai ma folausopoa le tolotolo faitauina e malu ai? O le mataupu a Isaia e pei e foliga e sau ai ma se tau fa'a'amu'amu i ana upu: Ia o ane la'ia e malelemo i le tafe mai o le Eufirate, o le malo tele lea o Asuria. E le gata e malelemo ai Suria ma Isaraelu a e afaina ai foi ma Iuta. Na faasalaina e le Atua lona nuu ona ua latou teena lana taitaiga mālū ma le toamalie, a e fa'amoemoe i isi malos i ese e fano ai ma fa'aumatia. E a, e mafai la ona sao mai le fuasou a le Atua?

[God punished his people for rejecting his quiet, steady provision (symbolized by the waters of Shiloah) and favoring reliance on worldly alliances which is destructive. Isaiah's message is a warning against misplaced trust. The nation, instead of relying on the dependable quiet power of God, chose to put their faith in powerful but ultimately fragile human alliances, which would lead to their downfall. Isaiah calls for steadfast faith in God over earthly solutions.]

E ese mai le fai mai ua upuvale Iesu, ma le lē faamamaluina o le sapat i atoa ai ma nisi mea, a e o le 'auga sili na lē faamalieina ai Iutaia e talia Iesu o lo latou Mesia, ona o lo latou vaai faatauvaa ma teena Iesu ona o le tagata lava o latou, o le atalii o le kamuta, a e o le tama a Maria. Talofa e i le Alii, fai mai le

molimau a le ‘au faievagelia na te’ena o ia e lona lava aiga ma tagata o lona lava nu’u.

Kerisiano fa’atuatua aemaise le Ekalesia pele, ia tatou talia Iesu ma lē te’ena o Ia, auā o Ia o le Seloā tafelemu a le Atua na saunia lo tatou Fa’aolataga moni. Lea lava na alalaga lutaia, ia i luga o i matou ma a matou fanau lona toto. A lea e le matū le toto masa’a i eleele o Isaraelu i nei ona po. Le te’ena o le Alii agaalofoa ma le agamalu, a e lavatoto ai fanua ma eleele, o le fuasou a le Atua ua le motusia ona o le tau i o le te’ena o lana upu.

(The rejection of our Lord Jesus Christ was due to several factors, such as familiarity with his humble origins making him seem an unlikely Messiah, their preconceived notions of what a Messiah should be, and a lack of faith that prevented them from accepting his claims.)

Fai mai le upu: Na mele le Manū e Afono, i le ma Neiafu na mele ai le Toelau. Ai lava ua māilili tele le agi a le to’elau ua le to’ulu ai ni popo se tele na mafua ai ona fai ane e lē aoga le toelau. Ona agi mai loa lea o le la’i malosi faimai na matua gaugau ‘ulu ma pa’u’u niu ma o’o lava i fale ua ta’atitia.

O nei ona po, ua matauina le se’e faai’āvai i ta’aga o le tai, ma ua māgaegae tulāfanua ina ua āia i galutaia pa’ō tuāpapa o le tai, i le fa’atuputupula’ia ai o le to’atele o tagata ua va’ai fa’atauva’a i manuia na fa’aali mai e le Atua mo Samoa ma ona tagata. Ua valo mai i le Ekalesia ma po mai le mulivae i le fa’avae na totō e matua ua mavae. Ona talu ai ua tai fana’e tutū le loto lē fa’amalieina, ma ua talia le paō taalililili o suiga o nei ona po, a e ua lē ‘apepeleina ai taeao na ‘itea ma valo’iaina ai ona manuia, ma ua fa’apei ai foi Samoa o Isaraelu le Nu’u filifilia o le Atua.

A e pe ua fa’asagaoge mai ea le Atua na aumai e alii misionare na ulua’i aumaia le Tala Lelei? Lea faimai na fa’agūgūtau i ai tevolo ma temoni, na saele fua ai le sailiga o le vai utupo na mafi aitu ai Samoa. Auā ua mate le puna na inuvala ai Samoa, a ua tu’utu’u ifo le vaiola o le fa’aolataga e fai ma Seloā tafelemu e inumalie ai Samoa. Ua to ea nisi mafuafua mo Samoa ma mamate ai ona ilamutu fanua, pe ua maua nisi ao na taliilagi, a e o ai na sailia ma valo’ia? O le tausaga 1841 na fai ai le mavaega a le Malietoa

Tavita: Ou te alu ifo ma mamalu o le Tafa’ifa o Samoa, a e Tupu Samoa i le Atua. Lele ua lalanu ai Ekalesia uma i le Ao Fa’alupega na to e Malietoa i ana Faife’au. E le se Seloā tafelemu lena na fa’ainu ai e ta’ita’i fa’atuatua o Samoa ona tagata ina ia tausiusi ai le va ma le Atua?

Po ua galo ea le Penetekoso-Fou na totō ifo i luga o le Ekalesia na mafai ai ona malamalama i gagana eseese nai Toea’i’ina Samoa na latou le iloa ni gagana Aramaika (Aramaic) ma ni gagana Eleni (Greek), a e na fa’aosofia e le Agaga Paia ma latou fa’aliliuina le Feagaiga Tuai ma le Feagaiga Fou mai ia gagana se’ia maua mai ai la tatou Tusi Paia Samoa? O le isi Seloā tafelemu lena a le Atua ua manuia ai Samoa, o lana Tusi Paia.

A e fa’aapefa le vavega o le liutuaina o vaega’au o taua a e lavea’iina Samoa i le tausaga e 1889, na toetoe lava ina tau Peretania, Siamani ma Amerika po’o ai e pulea Samoa? Na semanu lava e tele le ola e maumau ai, a e na tuli ifo e le Atua le afā fulifao ma gogoto ai va’atau ma feoti ai fitafita e to’atele a ia atunu’u tetele. O le fa’ailoga o lo’o ia Samoa le Seloā tafelemu o le Atua e puipui ‘aumafuamalu i taimi o faigata ma puapuaga.

O le fesili tele iinei mo Samoa ma le ‘Au Fa’atuatua: O tausisia pea nei Seloā tafetafelemu na fa’aalia mai ai le silisiliese o le Atua, a e na mafua ai ona se’e faatuāiato a e to fa’ata’esega mamalu o tupu ma alii sili o Samoa, ma fa’avaotulaina ai tupua sã ma laoi sã o laupata fetalai o Samoa, a e tupoupou ai le fue ma le to’oto’o o le Tala Lelei na aumai e alii misionare? O ai se ma’ema’e na te toe ‘aupui mai se tafega fou mo Samoa, a e le ma’au i le galuvai o le Tala Lelei o lo’o tafelemu pea, o lea ua atoa nei le 195 tausaga ma ua toe o se aga atoa le 200 tausaga? Pe le o lea na ‘alaga ai le Afioga i le Tama a Aiga Tupua Tamasese Lealofioa’ana III i lona masoe: “Samoa ia ffilemu.”? Auā o auala ia o le manumalo moni.

O le vaitau masani lenei i fe’au ma galuega tau fa’ai’ui’u a le Ekalesia EFKS i tausaga uma, e masani tele lava ona upu faifaia ai le Ekalesia e nisi ua liliu ese atu. O le faiga taulaga a le Ekalesia o lana Seloā tafelemu lea e lē motusia e auina atu ai lana fa’amanusina e agai ai le alofa tausii mai o le Atua i le tausaga atoa. Samoa, soia le fa’alogo i tala faatuamāoa, fai mai o le taga ma le fati lava lea e tasi a le EFKS e lē suia. Va’ai, e le’i fa’asa’olotoina Isaraelu mai Aikupito e o atu e fa’alaeveava i le

togavao. E leai, fai mai tu'u mai lo'u nu'u e o mai e fai taulaga mai ia te a'u. E le'i aveesea Samoa mai le pogisa ina ia sa'oloto ai so latou fa'amalieina fa'atagatanoa, a e ia 'au'auna le Atua.

Ua nunu aisea le to'au o ufi ma vaovaogatā le fefulitua'ai o Samoa ma ona tagata? Ona ua lafoa'i e Samoa le mea moni, a e 'apo le fa'amalieina i le fa'asesē mai a le lalolagi? O fea lau tu ma le aga fa'aaloalo to'amalie na mamanuina ai le soifua o tatou matua ina ua latou taliaina le Fa'atuatuga Kerisiano, a e o lea ua matua televave ona mou atu? Aisea ua aliali malosai ai le fete'ena'i o Samoa ma ua le talitonu o lo'o i ona lima ma ona 'a'ao ona manuia mai le Atua? E saga aisi pea ea Samoa i le fete'ena'i a e fa'apefea ona manuia ona tupulaga lalovaoa? O fea le mamalu o tu tauagafau ma le fa'atausala a Samoa, aemaise o ana tu fa'atamali'i?

O se fe'au taulogologo lea mo le pa'ia o le Ekalesia aemaise Samoa, tautuana ne'i mele manuia o le Atua o lo'o ia i tatou ona ua tosina o tatou loto i le tafa'asesē mai o le suamalie o le lalolagi o mana'oga. O le tapua'iga fa'a-EFKS ia mamalu ma ia le aveesea le tu fa'aaloalo ma le pa'ia e lē gaioia pe pisivale, a e to'alemu ma faia ma le mata'u. E le ni show po'o ni fa'aaliga i luma o le Atua e pei ona faia e nisi tapua'iga, a e mālū ma mamalu ma taualoa.

O le fa'avae lena e fatu mai ai le ola e to'amalie ma to'alemu. O Iesu lava ia le fa'ata'ita'iga sili o le to'afilemu o le Atua, na ta'ita'ina e pei o le mamoe i luma o e sele lona fulufulu, a e ua le tautala mai o ia. Na toafilemu lava, auā sa tu'u i ona luma le usiusita'i ma le fa'alologo i lona Tama o i le lagi. Tiga puapuaga mamafa o le satauro a e na tali ma le filemu ona o lona alofa tele mo i tatou ina ia fa'aolaina. Ua na le te'ena oe ma a'u le tagata agasala, ina ia ta maua le Olataga Fa'avavau. He looked beyond our faults and saw our needs.

O le a sa ta tali le Ekalesia aemaise Samoa? Talia loa Iesu ona toe maua lea o le fuasou o mala ma puapuaga. Fa'amaulalo nei loa i le Atua ma toe foi e fai lona finagalo. Talia le isi ou uso a tagata ma fefa'amagaloa'i nei loa. Ia manuia tele le pa'ia o le Ekalesia Aoao aemaise Samoa. Ona o Iesu le Alii. AMENE.

Saunia susuga Misiperetiso Ivava FS.

Ofisa Matagaluega Malua,

Matagaluega A'oa'oga Kerisiano.

O LE TUSI PAIA TOKELAU

I le suafa manumalo o Iesu Keriso le Ao o le Ekalesia, o sina ripoti pu'upu'u lenei e tusa ma le malaga sa mafai ona faimalaga atu ai nisi o sui o le Ekalesia Faapotopotoga Kerisiano i Samoa nei, mo le valaau fa'aaloalo mai a le Ekalesia Faapotopotoga Kerisiano i Tokelau (EFKT). O lenei faamoemoe o le faalauiolaina aloaia lea o le Tusi Paia Tokelau, ina ua mae'a ma ua aloaia ai ona tuufaatasia le faaliliuina o le Feagaiga Tuai ma le Feagaiga Fou, i le gagana Tokelau. Na tuua le atunuu e le aumalaga i le Aso Tofi, 23 Oketopa 2025, i le itula e 10 i le taeao i le Lady Samoa IV. Sa faimalaga faatasi ai tama o le Ekalesia, le susuga Failautusi o le Komiti o Tama o le Ekalesia, le Toeaina Faatonu susuga Amuia Seuala FT ma le faletua ia Tiresa, faapea le Failautusi Aoao o le Ekalesia, susuga Dr. Taipisia Leilua FS ma le faletua ia Vaisola, e toaono le aumalaga aofia ai susuga ia Fialii Mafuola FS ma Collin Faletese FS. O i latou ia sa fai ma sui o le EFKS, mo lea faamoemoe. (Sa le'i auai le afiga Taitaifono Fono Tele, ona o fautuaga a alii foma'i, ma le Taitaifono KAT, ona o nisi foi malaga tuagia o le galuega.

Na to'ai taunuu le faiga malaga i laufanua o Fakaofu i le Aso Faraile, 24 Oketopa pe tusa o le te'a o le 'afa o le 2.00 i le aoauli, ma faafeiloai ai e alii ma faipule o Tokelau, i la latou tu ma le aga masani i fa'aaloaloga mo faataliga o malo. O le Aso Gafua 27 Oketopa, o le aso tonu lea o le faamoemoe, na aloaia ai le tatalaina o le Tusi Paia Tokelau, i le fono usu a le Malo Tokelau. Sa auai faatasi uma ai Ulu o Tokelau, o Faipule uma o le atunuu, e aofia ai sui mamalu mai motu taitasi - o Fakaofu, Nukunonu ma Atafu. Ona sosoo ai lea ma le sauniga e tatala aloaia ai le faamoemoe o le Tusi Paia Tokelau i la latou lava gagana.

O lenei sauniga na ta'ita'i e le susuga i le Toeaina Faatonu, o le Taitaifono o le Ekalesia Faapotopotoga Kerisiano Tokelau, susuga Tui Sopoaga FT, a o le Failautusi Komiti Au Toeaina EFKS, susuga Amuia Seuala FT, sa tuu i ai le fa'aaloalo maualuga na te faia le Upu faala'ei'au mo le faamoemoe, e tomatauina ai le mamalu o le au valaaulia faapea le mamalu o tagatanuu uma o Tokelau sa auai i lea aso. Sa auai foi nisi o faafeagaiga mai Ekalesia Tokelau i atunuu mamao, aofia ai le Ekalesia PIC Ausetalia ma Niu Sila, o uo ma e masani i le taeao faitaulia o le tala faasolopito o le malo ma le EFKT. Na toe taliu manuia mai le malaga, i le Aso 31 Oketopa.

(saunia susuga Collin Faletese FS)

EFKS FUSI SAOLUAFATA

Faatomuaga:

O le Aso Faraile 21 o Novema 2025, na faapaia ma umusāina ai galuega sa feagai ma le EFKS i Fusi, Saoluafata i le Anoama'a. O nei galuega e aofia ai:

1. Suaina faalaulelei le fanua (*Landscaping*)
2. Fausia le auala aga'i i totonu (*100 m Driveway*)
3. Fausia o le Fale nofo o le faifeau
4. Fausia le Hall a le Ekalesia

O galuega uma mai le 2 – 4, sa faatinoina uma i totonu o le 3 masina mai ia Iulai seia oo mai i le amataga o Novema, 2025. Ona o se nofoaga e tu i le pito mauga ma gaoā, lea na sua faasolosolo ai lava le fanua mo se taimi e 3 i le 4 masina. O le faamoemoe ina ia lava se avanoa mo le fausia o fale o le Ekalesia, ma lava se avanoa mo se paka taavale. Ua telē foi le avanoa mo le toe fausia o le fale tapua'i i se taimi o i luma, pe a umi le soifua ma le ola.

Sauniga e Faapa'ia ai le galuega:

Sa ta'ita'ia le sauniga e le susuga i le Toeaina o le pulega a Anoamaa, ia Tafa'i Galumalemana i le Manatu Autu o lea aso, 'O le fale o Auro' mai le tusi e 2 Nofoaiga a Tupu 3: 1 – 8. Sa 'auāi le afioga i le Ta'ita'ifono o le Fono Tele ia Enefatu Lesa FT ma le faletua (na tauaoina le meaalofo \$20,000 a le EFKS), le Ta'ita'ifono o le Komiti a le Au Toeaina Susuga Asotasi Gu Time FT ma le Faletua (o le tama faatonu fo'i o le Matagaluega Apia i Sasa'e), o faafeagaiga ma faletua o le pulega Anoama'a, o nai uso ā faifeau, o aiga ma uō sa o latou molimauina lea aso fialia ma le loto faafetai o le Ekalesia i le Atua, ina ua tau lau o le faamoemoe.

O la le faiSalamo, *Na ou fialia ina ua latou fai mai ia te au, Tatou te o i le fale o le Alii. Ierusalem e, e tutū o matou vae i ou faitotoa.* (Salamo 122:1) Ae o le faamanatu a Mose ia Isaraelu; *A ē 'ai, ma 'ona ai, ia e faamanu atu ai i le Alii lou Atua ona o le nuu lelei ua ia avatu ai ia te oe. Ia oe, ne 'i galo ia te oe o le Alii lou Atua, i lou le tauti i ana poloaiga, ma ana faamasinoga, ma ana tulafono, ou te fai atu ai ia te oe i le aso nei;* (Teuteronomo 8:10&11). Viia le Atua i mea uma ua faia, ua lelei ma matagofie. Tumau pea lona viiga e faavavau.

Tuātala o le Galuega:

Ua 9 nei tausaga talu ona osia le mātou feagaiga ma galulue i Fusi, a o lenei faato'ā mafai ona faataunu'u le faamoemoe o lenei galuega. Sa mātau pea ma vaai i le malos i le Ekalesia, fuafua i ai le taimi tatau a le Atua, e faatino ai le galuega.

Na ma taunuu mai ia Tesema 2016, ma mātauina ai, le telē o se lu'i mo o ma'ua tagata, talu ai le faigata o le nofoāga. E pu mo'omo'o, gaoā ma faigatā ona a'e mai i luga nei. O le fale fo'i sa i ai, sa telē se āfaina, ona ua pala le tele o laupapa, ma lē toe saogalemū. Sa talanoa ma nisi mātūtūa o le aulotu ma iloa ai, ua silia ma le 60 tausaga o le fale sa taumafai ai e nai tamā ua mavae atu le galuega. Sa i ai nai faaopopoga laiti sa fai i ai, ae ua oia lava le fale-faavae ona ua matua.

Leitia fo'i nai aufaigaluega na muamua atu, le vave ona toe o, ona e lē faigofie le nofoaga nei. E faapea fo'i se lagona na tau faavaivaia ai e le tiapolo le ola finau mo le galuega. Peitai o le faamalosi 'au, faalototele ma le taupati mai o le Ekalesia e ui i lo latou lima vaivai, na malos ai fo'i le auauna ina ia faataunuu lenei galuega. Sa tatalo pea i le Atua, ina ia aumai le malos, e fai ai le galuega. Lenei ua tino mai, viia le Atua e ona le malos uma, ua mafai e le Ekalesia lenei galuega.

Tau o nei Galuega:

O se tau faata'ita'i atoa o lenei galuega. (*Estimated costs*).

Tupe Maua:

Golf Tournament	23,982.00
Tausala Online	83,700.00
Other incomes	12,950.90
Raffle	<u>165,850.00</u>
	\$286,482.90

Tupe Fa'aaogā:

Suaina o Fanua (Landscaping)	59,900.00
Driveway (100meters)	22,458.00
2 x Buildings	340,417.00
Other Expenses	<u>12,915.00</u>
	<u>\$435,690.00</u>

-\$149,207.10

Ua 4 tausaga o saili seleni le Ekalesia, mo le faataunuuina o lenei galuega. E lē faigofie ma taugofie aemaise i lenei vaitau o le si'isi'i pea o le tau o le soifuaga. E pei ona atagia i le tau o le galuega, o loo i ai si a mātou aitalafu o le a mātou galulue e totogi.

O le FAAFETAI:

E le fa'aititia le agaga faafetai, i le agalelei i a mātou sailiga seleni. Faafetai le talisapaia lelei o le tagata na asamo, ma aoi mo se fesoasoani mo le taumafaiga o nei galuega. Mai lava ia te outou tamā o le Ekalesia, i uso a faifeau i le galuega, o le afioga i le faipule o le Itumalo o Anoamaa 2, o aiga ma uo,

sa tali mai ona o lo outou silasila i le faaleuso, faaletuafafine i le galuega a Keriso. E le gata i Samoa nei, ae o uso a faifeau ma aiga i Niu Sila, Ausetalia, Fiti, Amerika. O le fua lea o la outou ma'a na togi e ala i le aao mafola, lea ua mātou niuali ai auā Iesu ma Lana Talalelei. E lē lava upu e faaleo ai le agaga faafetai ona o lo outou agalelei. Faafetai i tama fanau a Fusi i Samoa nei ma soo se tafa o le lalolagi, ona o le agalelei faasoa mai e ala i seleni na fesoasoani ma asia ai i le galuega.

Mulia'i se faafetai isi a mātou Ekalesia i Fusi, le pāia aua le matua ia Fineitalaga, susū o Ma'opū, ae tainane le Falefia ma le Nofoituaiga. E manatua fo'i nai matua ua lagomau mai tia, ma lo latou malosi sa tauasa mai ai le galuega. Malo le galulue ma le lē faalogologo tigā, ua tau ai lau o le faamoemoe. Ia tūmau le faamalosi mai a le Agaga Paia, i galuega fa'aauau mo le tautuaina o le galuega a le Atua.

O le FAAMANUIA!

Ia alofagia e le Atua ia sautualasi o outou manuia, ona o le alolofa mai i lenei Aulotu lima vaivai. Matou te fia faamanuia e pei ona sa'afi le faisalamo; *Ia i ai le manuia i totonu o ou pa, o le manuia i totonu o ou maota. Ona o o'u uso ma a'u aumea mamea, ou te faapea atu ai lava, Ia ia te oe le manuia. Ona o le fale o le ALII lo tatou Atua, ou te saili ai le manuia mo oe.* (Salamo 122:7-9)

Faafetai Faafetai Tele.

***Alo Polani Pita FS & Milly, ma le EFKS
Fusi, Saoluafata.***

FAAU'UGA K.F.MALUA

O le Aso Toonai 29 Novema na faataunuaina ai le Faau'uga a le Kolisi Faafaifeau Malua, na ta'ita'i e le Taitaifono Komiti Malua ma fai le Lauga, Tusi Paia na faitauina e Vaegaau Liko FT, Tatalo Faleulu Malaulau FT. Na faae'e ai tofi o Porofesa Lagolago e to'alima: Rev Dr Arthur John Wulf (OT), Rev Dr Alesana Palaamo (Practical Theology), Rev Dr Visesio Saga (NT), Rev Dr Moleli Alama (OT), Rev Dr Malutafa Faalii (OT). O e na faae'e aao mo le faauuga: Tunumoso Iosia FT, Tauaana Mataafa FT, Fili Matalavea FT, Pouniu Faamausili FT, Misipalauni Faatau FT. Na ta'ua i le ripoti faaletausaga a le alii pule, Professor Dr. Vaitusi Nofoaiga FS, o le tausaga fou 2026 aulia i le alofa o le Atua, o le a amata ai le a'oa'oina o le faailoga o le PhD (Foma'i) i Malua. E 21 A'oa'o Faai'uasoa na faau'u, ma le 16 Faifeau ma A'oa'o mo le faailoga o le Masters & Masters (Distinction). ***(fa'aauau itulau 12)***

MASINA O TAULAGA!

Ua avea le masina o Novema e fai ma masina o faiga taulaga a le Ekalesia i tausaga taitasi, i Taulaga Samoa, Taulaga Au Taumafai, & Taulaga Au Leoleo. O se faatafiti talafeagai lea, a o le'i taualuga galuega o le tausaga i le faailogaina o le Aso Kerisimasi, na fanau mai ai le Taulaga Sili a le Atua mo le faaolaina o le lalolagi atoa. E tofu le Matagaluega ma le Aso Sa faapitoa o le masina e fai ai a latou faiga taulaga, po o Faigame e pei ona faaigoa muamua ai e auga tupulaga sa fai ai faiga taulaga i le masina o Me, i le taimi o le Fono Tele ia Me. E maitauina o loo siitia pea le aofaiga o Faiga Taulaga a le Ekalesia i tausaga taitasi, mai le nofo a Matagaluega, Pulega ma Aulotu. O se faata'ita'iga o faiga taulaga o lenei tausaga, ua tuuina atu ai le tala o faiga **Taulaga Samoa a Faleata:**

<u>Pulega Faleata Sisifo:</u>	<u>2025</u>	<u>2024</u>
1. Peteleema Fou*(223)	\$91,640	\$83,020
2. Elise Fou (182)	\$59,240	\$53,520
3. Vaitete Uta (502)	\$189,540	\$183,090
4. Nuufou (258)	\$26,700	\$24,000
5. Vailoa Tai (291)	\$47,110	\$40,109
6. Petania Fou (98)	\$23,790	\$23,375
7. Tulaele (215)	\$51,880	\$46,950
8. Toamua (512)	\$60,000	\$55,645
9. Vailoa Uta (136)	\$29,210	\$35,210
10. Vaigaga (300)	\$32,882	\$65,050
AOFAIGA	<u>\$611,992</u>	<u>\$609,969</u>
(*Tagata Lotu 1,512)	<i>Faasiliga</i>	<i>\$2,023</i>

<u>Pulega Faleata Sasa'e:</u>	<u>2025</u>	<u>2024</u>
1. Vaimoso (242)	\$96,700	\$86,560
2. Alafua (160)	\$94,190	\$85,190
3. Ululoloa & Siusega (216)	\$82,000	\$70,000
4. Sinamoga (261)	\$75,200	\$60,740
5. Lepea (230)	\$45,500	\$39,410
6. Ketesemane Fou (99)	\$30,650	\$29,350
7. Aleisa Sisifo (129)	\$26,919.80	\$24,630
8. Lotopa (85)	\$17,480	\$15,400
9. Aleisa Sasa'e (90)	\$16,000	\$13,330
AOFAIGA	<u>\$484,639.80</u>	<u>424,610</u>
(*Tagata Lotu 2,717)	<i>Faasiliga</i>	<i>\$60,029.80</i>

TUUFATASIGA	2025:	<u>\$1,096,631.80</u>
	2024:	<u>\$1,034,579.00</u>
<i>Faasiliga</i>	2025:	<u>\$62,052.80</u>

Malo fai taulaga! Ia fai ma viiga o le Alii.

O LE PEROFETA MULIMULI

(O le tala faafagogo faaSamoa mai le tusi 'The Last Oracle' tusia e James Rollins)

Se'i vagana...

Na tu faasasa'o a'e Elisapeta i luga ma sōsō teisi faalatalata atu, o ona popolega sa i ai muamua ua te'a ese. Na ia autilo atu i ata e lua o faaali mai le tv. Na amata ona ia malamalama i le mea o loo ia sailia. Sa ia te ia faitauga o upu Harapana na faaliliu faa Eleni ma faa Initia. Faaliliu. Na ia manavanava tetele. I luga o le komepiuta, sa i ai le amataga o se maa Roseta faanumera mo le gagana leiloa lenei.

Na ia toe foi mai i le laina motumotu o le faitauga sa i lalo ifo o le ata o le tamaitiiti asu. Na ia iloilo lelei, faatusatusa, ma to a'e foi i luga ata o tusitusiga sa i luga o le puipui. Na amata ai ona ia iloa ni mea e foliga tutusa.

E mafai ona ia faaliliuina?

O lona iloa o loo ua i ai se mea tāua, na ia faasaga ai loa i le galuega.

12:45 afiafi.

Na iloilo e le Taitai Aoao o Maratovi Savina lona fili. Na ia sioa i le Amerika o i luga o le tv.

Na tu pea o ia i totonu o le faalapotopoto o le susulu o le moli o le ana. Na ia sii a'e le meafaaleotele leo i ona laugutu.

"Alu nei aga'i i faitoto'a!" na ia ou atu ai ma le ma'ai. Mai le auala na ia puna ai i upu a le fafine, na iloa ai ua lagona e le tamaloa lona leo. Sa lei i ai se faaletonu i faaleotele leo i autafa o faitotoa.

"Lau afioga i le Taitai Aoao," na fai atu ai le inisinia. "O loo i ai se valaau faamuamua mo oe mai le Nofoaga Faatonutonu o Pomu i Akagalesi."

Na faapi'o ifo i tua Savina ma tago atu i le telefoni. Sa i ai se tasi o ana ofisa mo fesootaiga na tuu ai iina. "O Maratovi lea."

"Lau afioga le Taitai Aoao, e i ai se lipoti lē logo lelei o loo sau mai le Ukureni. E foliga mai o Senatoa Solokova ua maliiu."

Na manava faatatope i totonu Savina. Sa ia taofiofi nisi ona lagona ne'i soona osovale. Ui i lea, na ia lagona lona fa'a'i pei ua nonoa mau. E le'i iloa e lana sooupu o Nikolasi o lona atalii, ae sa na o le laua vavalalata ma lagolago atu i ana fuafuaga iinei. Na fa'aauau le talanoa mai a le sooupu. "O loo feavea'i solo tala salalau e faasino i mea na tutupu. Fai mai nisi na fasioti e tagata faatupu faalavelave, a o nisi e faapea sa aafia o ia i ni gaioiga sa fai i lea nofoaga. Na pau le mea mautinoa ua maliiu o ia. O meapu'eata mai totonu o le Malu na puipua lelei, na

faailoa mai ai lona tino faatasi ma i latou na lagolago i ai. Na fanaina i lona ulu. O loo maua luga pea le malosi o kasa oona e lē mafai ai ona saogalemu le aveesea o lona tino, peitai o loo tapena atu i ai. Ou te lē mailoa pe..."

Na felelea'i solo le leo o le tamaloa, a o Savina e le'i toe faalogo atu i ai. Na pupuna a'e loimata i ona mata. Na ia faataliaga i tua lona ulu ne'i maligi ma sisina ifo i lalo. Ina ua uma le valaau a le tamaloa, na ia faafetai atu i ai ma tuu i lalo le telefoni.

Na faliu malie ese lona ulu mai le inisinia ma le tekinisia.

Ua malii Nikolasi. O lona atalii e toatasi.

Atonu o se vaega o lona tagata ua leva ona iloa lea tulaga. Mo le itula atoa talu ai, sa ia lē mafai ona lūlū ese se faalogoga o le faanoanoa. Na faasolo ina mamafa tele lana manavanava. Nikolasi...

"Lau afioga le Tamaitai Taitai Aoao?" na fesili lemu ane ai le inisinia.

O lona leo filemu sa na o le faaosoga o lona ita. Na ia faasaga atu i le tv. E le'i minoi lava le Amerika. Pe afai o se suau'u lona faanoanoa, o lona ita tele ua fai ma afi e tutu ai. Na tupu a'e se toatamai tiga i totonu ia te ia. Ua alu le aso o faasoesā le Amerika ia te ia, a o lenei ua ia lu'iina o ia.

Ua gata ai loa i i.

Ua matutū ma mago loimata i le vela o lona ita.

Atonu ua malii lona atalii, peitai ua ia fanaua mai se isi tamaititi, i le miti o le a totogo a'e mai efuefu o iinei. E le na o le toto o aiga se auala e tuua ai se nofoaiga. O le a ia faai'uina le mea na fasioti si ona atalii. O le a ia sailia se isi tagata e sui tulaga ia te ia. Atonu e umi se taimi e alu ai, peitai o le a faataunuaina lava. Ua gaioia e le lalolagi lona atalii. Peitai o loo ia te ia le paoa e toe faasagatau atu ai.

O se fe'ai matautia na gogolo a'e i lona leo, na mafua ai ona toe laa i tua le inisinia. "Ua lava!" Na ia faasino atu i tv e lua sa i le itu agavale. Na faailoa mai ai le fatu o le Gaioiga Saturino. O le tasi na faaali mai ai le vaaiga i luga o le siafu agai i pomu o loo tatao ai; o le isi o loo faasinotonu i le seti o mata o i luga o le fola. "Amata faaola le Saturino! Fua mai i la'u faitau!"

Na liliu atu le inisinia ma le tekinisia i a la'ua vaega na atofaina. Na la'ua soona ki i faamau o la'ua laau. Na pulato'a Savina i le tamaloa o i le ogatotonu o le tv. Afai na te le aumaia Piota ia te ia, o le a ia tutuina se afi i lalo o le tamaloa. E leai se solomuli, pe sola.

“Ua lanumeamata mai luga o le laupapa,” na fai mai ai le inisinia. “O loo faatali atu i lau maka.”

“Alu!”

Na ia manava tele ma autilo atu i tv e lua. O le tasi na emo mai ai se malamalama. Na ia faalogoina se pasae mamao mai o le pa o se pomu. Na felelei solo mai ni maa i le meapueata, sosoo mai ai ma le tafe o palapala na punitia ai ma le vaaiga. I le isi tv, na taavale matala le i’oimata a o tafe malosi atu i ona luga se alavai o ‘alā ma palapala. Se taimi mulimuli ane, ona tafe ifo lea o vai uliuli mai luga, i ni faaputuga tafega. Na sa’o lelei le fika a inisinia. O le lolo’u ifo o tafega na tofu sa’o ifo lava i le gutu faamaga matala atu o le i’oimata.

O lea ua amatalia.

Ua fasioti e le lalolagi lona atalii. Peitai o lona atalii faalemafaufau o le a nbgghhjnnnjmjjjjjjola pea. E ui ina ua ia amataina le gaioiga i lona ita e vaelua tutusa ai le faamoemoe ma le tauai ma sui, a e na te lē teena se musele pogisa i totonu o lona faau’amea. A o tafe le vai, na ia iloa o le a taunuu lana tauai ma sui i le lalolagi ona o le mea ua na gaioia mai ia te ia i le aso nei.

Na ia faasaga atu i le Amerika.

O le uma ai o lona faamalosi, na liliu ane lona ita ma lona fia tauai ma sui i se isi sini.

E le’i uma lana galuega.

A o Monike, na ia tu a’e i luga mai le mea na ia taatia ai. O loo tatagi pea le pa a le pomu i ona taliga. Na saisaitia o ia i le va apiapi, o le malosi o le pa o le pomu na taia ai ona taliga e pei o le pati o ni lima lapopo’a o se sau’ai. Na ia ufiufia Piota i lona tino.

A o tatagi pea le t̄ o ona taliga, na ia fesoasoani e faatu a’e le tama i ona vae. Na ia lagona atu le gogolo mamao mai o tafega i ona tua, o le leo e pei o le tagi mai o se tarako tele. Peitai na iloa e Monike le gogolo o loo ia faalogoina.

O le tatafe o vai.

O tane e tele o vai.

Na ia iloa foi le uiga o na mea – le pa o le pomu, le tatafe mai o vai i lalo o le elelee – o lona uiga ua ia toilalo. O le Gaioiga Saturina ua amata faagasolo, o loo sasa’a lafoa’i ai otaota o kasa faaniukilia i le fatu o le lalolagi.

Na toe pasae mai sipika faaleotele leo i autafa o faitotoa.

“Tuu ese a outou meataui!” na valaau mai ai le fafine i se leo fefiloi o aisa ma le afi, o se naunautaiiga malulu vaao o loo noanoa i le ita tele. “Aumai le tama i le

faitotoa. Ma ou te fautua atu ia faavave lau gaioi. O loo vave le siisii i luga o le malosi o le kasa oona i le ea. E itiiti ifo i le lima minute, a e te le’i mitiia se inumaga o kasa oona.”

Sa le’i i ai se filifiliga a Monike. Na ia lūlū faamatala ese ana fana ma faatoulu i lalo. Na aapa atu Piota i luga ma taofi mau le ogalima o lona lima sa saisai. Na la’ua faanatinati faatasi atu i le selau iata mulimuli, tamomo’e a o siisii le kasa i totonu o le ana. O luma atu, na matala lemu faitotoa, faailoa mai ai se laina o fitafita toa lima ma latou fana ua ta’i.

O la latou komiti faafeiloa’i.

Na uunai atu e Piota ia faamalosi, peiseai e i ai se mea o iloa e le tamaitiiti e lē o silafia e Monike.

O le vae manu’a o Monike sa pei e tutui e se nila i ana sitepu taitasi. O lona fatafata na fufusi. O lana manava na topetope. Na ia vaai ifo i lalo i lona puimanava. O loo ia ofuina pea lana pine fua vevela. O ana sitepu uma e matalatala ai. Na ia iloa atu le pito i luga. Na fa’aali mai ai le lanu mūmū malosi, a o ana laasaga uma o iata taitasi, na faasolosolo ai ina lanu uliuli.

E ui i lona vae, ae na ia tamo’e saosaoa pea.

Na taufetuli televave Piota ma Monike mo faitotoa. A o la’ua latalata atu i le ulufafo, na pa faafuase’i se pomu pei se faititili, na sau mai fafo i le vaega o le Kelianiapinisiki 88. Na faate’ia le tautevateva o laa a Monike, a e na uunai faamalosi atu e Piota e o pea i luma.

O fitafita, ua faapena foi le faate’ia, ua latou faliu mai i tua. O le toatasi na pa’ū faō i le fefe.

O Piota na ia faasasa’o tonu i le avanoa. O lona taunuu atu i le laina, na oso a’e ai le tama i luga o le tino o le tamaloa. O le isi ona lima na ia aapa atu ma se’i mai se fana mai lona faamoega a le isi fitafita. Na suigi le tama ma tuu atu le auupega i le lima e tasi o Monike.

Sa le’i i ai se tau faatemutemu. Na taatia tonu i le alofilima. Na taavili e Monike lona lima. I le va va lalata sa i ai, na ia fana tutu’i atu ai i le laina o fitafita, na fa’aaoga ai lona tomai o natia loloto i totonu atu nai lo lona manatua ua tafiese.

Na ia tafana uma atu pulu o lana fana, ma to’ulu ifo ai fitafita e toailima.

Na ia tia’i ese lana fana. Na oso atu Piota i luma ma tago atu i le isi fana. Na ia tuu atu ia Monike, toe aapa atu i le lima o lona ofu, ma la’ua o ese loa.

O autafa atoa o le ana, na pa pa mai ai le tele o isi pomu. Na faataiō le tele o tamaloloa a o pupusa a’e le asu mai le tele o fale na tuulafoa’i. A o ia tamo’e,

Na sii a'e le lima o Luka ma tepa atu i tua i fitafita o potopoto. "E i ai la'u tamaloa...oi a lea."

Na tamo'e atu se tamaloa tino itiiti ia i la'ua. Na ofu i lavalava enaena sima ma se pulou uliuli. Na talanoa faa Romani le toalua.

"O Rati lea," na faafeiloai atu e Luka le tamaloa.

"Manaia le igoa," o le tomumu lea a Koualasaki.

"O ia o se sikauti. Talenia i le su'ega o auala e leai se tasi na te iloa. Atonu na te silafia se auala, peitai e tatau ona o se vaega toaititi. E le sili atu i le toalima pe toaono. Na vaavaai atu Luka i lana vaega toaititi.

"Atonu na o ta'ua. Va?"

"Va," na malie atu ai Koualasaki, ona tepa atu lea ia Karai mo le faamaoniga.

"O isi tamaloloa o le a latou faavevesi le au Rusia," na faaopoopo atu ai Luka, a o talotalo atu lona lima i le vaega'au o le laueleele ma loli.

"O le a ta o la?" Na fesili ai Rati i le faalgilisi panupanu.

"Va," na tali atu ai Karai, maua mai ai se ataata mai le tamaloa ma se pati i luga o lona tulivae.

Na tapena latou auupega – fana tetele ma tama'i fana – ma mulimuli atu i le tamaloa itiiti agai i se faaputuga o otaota. Sa le'i iloa atu e Karai se auala e ui ma sao atu ai. Na geno atu Luka i le vaega'au o le elelee a o latou pasi atu. O se faaili maati na sosolo a'e i le ana faatumulia i le asu.

Na faasino atu e Rati le latou vaega itiiti i lalo o se vaega faatifa o le puipui. Na 'alo punou ifo Karai ma iloa ai e tau atu i se faamalama pito i lalo o se potu lata mai.

A o latou faaauau lemu atu i totonu o le ala o le sikauti, na faalogoina e Karai se ea a'e o se tauvalaau mai ona tua.

"Opere Roma!"

E pei o se mumu tatali o le afi i vaovao mamago, le sosolo o le valaau.

Na faateteleina le pa pa o pulufana ma roketi.

Na faasolo atu pea i luma, a o talosia e Karai latou te le'i tuai.

O Savina na alu ifo faavave i lalo o sitepu i totonu o le fale. Na ia le amanaia le eeva o lona tua, o le tiga tutui i lalo o ona vae, ma le ta ta o lona fatu. I le ulua'i pa'o mai o leo o osofaiga, na ia loka ai faitotoa tetele, tapuni ma faamausalī.

O luga a'e, o faatali mai ai mo ia, ni fitafita aupito malolosi se toalima na faatonuina e Foma'i Petarovi. O le fuafuaga sa fai, ina ia faasosola ese tamaiti e toalima, e amo i tua o fitafita. E le sili atu. E le mafai ona ia ave uma le toasefulu. O lo latou avanoa aupito

sili ona saogalemu o le faagaioi vave ma lelei. O le pagota Amerika ua na aumaia le ata faata'ita'i. O ia ma tamaiti na sosola ese i se auala 'alo sa i tua.

Ma o le a faapea foi ona latou faia.

Peitai o Savina sa i ai se mataupu mulimuli e tasi na ia fia faate'a muamua.

Na ia ulufale atu i totonu o le fale teu oloa ma tau atu i le inisinia ma le tekosinia o saeia ese ki o komepiuta. Ua uma ona la'ua fa'aaoga uaea maneta e fufulu ai kalaivamālō.

O le faaleagaina o ki faatonutonu e mautinoa ai e leai se isi mea e faalavelaveina ai le faagasologa o le Gaioiga Saturino.

"Ua loka lelei mea uma?"

Na lue mai le ulu o le inisinia. "Se'ilogā o se inisinia atamai na te toe mafai ona faaleleia i totonu o se vaiaso."

"Lelei tele." Ona ia tago lea i lana tama'i fana ma fana ai le inisinia i lona muaulu. Na tau tamo'e sola ese le tekosinia, peitai na faliu atu Savina ma liliu atu lona lima, ma fana ai o ia na pa'ū i lalo o fasitepu, o lona fa'a'ī ua masae atoa.

Na ia mimigi solo, ma i'u ina oti o mole i lona lava toto.

Sa le'i tuua e Savina se avanoa e toe maua ma pu'ea ai i la'ua e nisi. O mea na la'ua faaleaga, e mafai ona na toe faalelei pe afai e faafefe ma faamalosi e nisi i auupega.

Na te le mafai ona tupu lena mea.

O lona mana'o e faamalie atili lona loto, na tago ai Savina i se to'i fa'aaoga e fuimū, sa i tua i puipui ma laa atu i ki o komepiuta. Na ia sii maualuga le matau, ma talepe atoa ai komepiuta ma laau tekonoosi. Na uma, ona ia tuu lea o le matau i lalo i le fola, ma faalagolago atu ai i lona 'au. Na ia sioa faatau pupula atu i le laina o tv. Sa fa'aali mai ai pea ata mai nisi meapueata. Na ia manatu o le a ta'ei ma talepe uma foi ma tv, peitai ona o lona tua ua mapuna, na te le'i iloa ai pe na te toe gafatia ona sii i luga le to'i.

A e o le iuga, o le a sona uiga?

Na ia tia'i ifo le to'i i lalo, a o ia faatau pupula atu i le tv ogatotonu. Na toulū ifo le vai i se faaputuga o otaota uliuli.

Se'i o latou vaai la i le mea na ia faia.

Na ia ataata lemu, o fiafia i lenei ana gaioiga sauā mulimuli, ona faliu lea ma aga'i atu i le fasitepu.

Se'i latou vaai a o malepe ma mate le lalolagi.

E leai se isi na te mafai ona toe taofi o ia.

(e faia pea...)

AUFAAU'U KOLISI FAAFAIFEAU MALUA, 2025

BACHELOR OF DIVINITY (BD, HONORS)

1. A'oa'o: Faa fouina Samuelu, 40
Nuu: Saoluafata/Saleimoa
Faletua: Melanie Samuelu, 33
Nuu: Saoluafata
MATAGALUEGA: APIA SASA'E
2. A'oa'o: Galovale Vili Opelu, 45
Nuu: Sataoa, Lotofagā, Lufilufi
Faletua: Punalei Vili Opelu
Nuu: Leulumoega, Tufutafoe, Neiafu
MATAGALUEGA: AUKILANI

BACHELOR OF THEOLOGY

1. A'oa'o: Andrew Fui Taotofi, 37
Nuu: Savaia & Tafagamanu, Papauta
Faletua: Fagaiaava Fui Taotofi, 37
Nuu: Fagalii, Kologna-Tonga
MATAGALUEGA: AUKILANI
2. A'oa'o: Ben Tuia, 33
Nuu: Sataua, Samata i tai, Tuana'i
Faletua: Ueligitone Tuia, 31
Nuu: Saleapaga, Faleula, Sasina
MATAGALUEGA: ITU O TANE
3. A'oa'o: Gafatasimalo Foaga, 52
Nuu: Lefagaoalii, Safotu
Faletua: Sapi Foaga, 47
Nuu: Matatufu Lotofaga, Palauli
MATAGALUEGA: AUKILANI
4. A'oa'o: Ioane Talasilia Sosene, 46
Nuu: Fakafo, Tokelau
Faletua: Tuvale Talasilia Sosene, 46
MATAGALUEGA: EFKT
5. A'oa'o: Junior Saolotoga Atanoa, 31
Nuu: Tuanai, Utualii, Saipipi
Faletua: Meressapinni Saolotoga, 31
Nuu: Manono-uta, Fusi Safotulafai,
Matautu-uta Apia
MATAGALUEGA: MALUA
6. A'oa'o: Junio Sanerivi, 42
Nuu: Fagalii, Apia
Faletua: Vaonila Sanerivi, 42
Nuu: Vaovai Falealili
MATAGALUEGA: LAUMUA O AOTEAROA

7. A'oa'o: Lauina Sofe, 42
Nuu: Samalaeulu, Gagaifolevao
Faletua: Veronika Sofe, 37
Nuu: Samalaeulu, Lalomanu
MATAGALUEGA: ITU O TANE
8. A'oa'o: Liaina Mauga, 31
Nuu: Tuanai, Saleapaga
Faletua: Ranan Mauga, 32
Nuu: Malie, Lalomanu
MATAGALUEGA: MALUA
9. A'oa'o: Mareko Fasi Toma, 28
Nuu: Fagamalo, Matautu-tai Apia
Faletua: Fotuivasa Leuma Toma, 23
Nuu: Maagao, Laulii, Leufisa
MATAGALUEGA: ITU O TANE
10. A'oa'o: Marini Jason Setefano, 30
Nuu: Lepa, Matautu-uta, Fasitootai,
Matautu Lefaga
Faletua: Momoi Saunoa Setefano, 30
Nuu: Fuailoloo Mulifanua, Levi Saleimoa
Samatau
MATAGALUEGA: KUINISELANI I SAUTE
11. A'oa'o: Melila Faasalafa, 33
Nuu: Tafua, Vaiala, Fugalei, Gautavai,
Moataa
Faletua: Maupenei Faasalafa, 32
Nuu: Salamumu
MATAGALUEGA: FAASALELEAGA
12. A'oa'o: Patamo Soa, 27
Nuu: Gautavai, Vaitogi, Toomatagi,
Vaigaga
MATAGALUEGA: HAWAII
13. A'oa'o: Petaia Junior Tuifao, 30
Nuu: Matautu Falelatai, Faleasiu, Faatoia
MATAGALUEGA: KUINISELANI
14. A'oa'o: Poao Seti Laufiso, 38
Nuu: Fogapoa, Lelepa, Nofaalii
Faletua: Tioatamanino Gafa Laufiso, 36
Nuu: Fasitoo-uta, Salani, Laulii
MATAGALUEGA: AMERIKA

(fa'aauau itulau 16)

O I LATOU UA FAI I LAGI LE FOLAUGA

ROSA ELETISE SULUVALE

(Tinā Penisione Malolo).

28 Ianuari 1952 – 24 Oketopa 2025.

Toe Sauniga - Aso Gafua 27 Oketopa 2025.

Ta'ita'i o le Sauniga - Rev. Enefatu Lesā FT
(Ta'ita'ifono Fono Tele).

Malumalu EFKS Moata'a, 11:00am.

Soifua Galue o Rosa Eletise Suluvale (Faletua o le
Faife'au Penisione Malolo):

1. 2003 – 2006 : A'oa'o & Faletua, Kolisi

Fa'afaife'au i Malua

2. 2007 – 2010 : Faiaoga Kolisi Fa'afaife'au i
Malua

3. 2010 – 2023 : Faife'au Tausinu'u – EFKS
Toamua

4. 2023 – 2025 : Faife'au & Faletua Penisione
Malolo.

Ua fa'amānavaina e le Atua galuega a si o matou
tinā peleina, le Faletua ia Rosa Eletise Suluvale
(Penisione Malolo). Na soifua mai i le Aso Gafua
28 o Ianuari 1952, mai i ona tuaā o Rev. Matatia
Mariner & Feagaimaleata Feo La'i. Na tuua le malō,
e ala i le malaga a le maliu ma le oti i le Aso Faraile
24 o Oketopa 2025, ina ua 73 tausaga, 8 masina
ma le 26 aso o lona soifua auauna.

Sa ta'ita'i e le Susuga i le Toeaina, Rev. Enefatu
Lesā (FT/Ta'ita'i Fono) ona Toe Sauniga, faatasi ai
ma le lagolagosua, i Susuga Fa'afeagaiga o le Pulega
Vaimauga i Sisifo. Ina ua penisione malolo mai i le
Galuega Tausi Nu'u mai i le EFKS i Toamua, i le
tausaga e 2023, sa fa'aauau pea le soifua galue o le
tinā penisione ia Rosa i totonu o le matou Ekalesia i
Moata'a. Sa toe amata aloaia ai foi le la matāfale
lotu, ma le tamā Faife'au Penisione ia Eletise Suluvale.

O Rosa o se faletua e naunau tele lona loto i le Galuega
a le Atua. Ua maua'a lona faatuatua; ma o se
Kerisiano faamaoni. E faatuputeleina lona fiafia e auai
mai i Tapuaiga i Aso Sa taitasi. E le gata i lea, o le
faamaopoopo ma auai mai i Lotu a le Au-Leoleo

ma Sauniga faa-le-Au Taumafai. Sa fa'aauau foi ona
tiute i Faletua o le Aufaigaluega, e ala i le taitaiga o
Sauniga Lotu a le Mafutaga a Tinā. O se tasi o itu e
mataina ai pea si o matou tinā penisione, ma e lē
mafai ona faagaloina, o lona auai mai lea e
faamaopoopo i le matou Aufaipese. O le tasi lea o
ona sao tāua i le matou Ekalesia ma le Galuega a le
Atua. E leai se faavaivai, auā e oo lava i lona aiga
atoa ma le fanau, ua ia aumai uma e pepese ma lagi
viiga o le Atua. Ae tainane, e lagolago sua ai i le
tamā penisione ia Eletise ma le au-Asafo.

E ui lava o lea, tatou te le fai loto i le pule fai to'atasi
a le Atua Silisili Ese. Ia fa'amaise pea le Agaga o le
Atua i le paia o Aiga, aemaise ai o le Tamā Faife'au
Penisione Malolo – Rev. Dr. Eletise Suluvale (FS)
ma le Nofo-a-Alo. Ia mapu atu ia lo tatou tinā
Penisione Malolo - Rosa Eletise Suluvale i aao alofa
o lo tatou Tapaau Sili, i le nuu paia i lugā, *e le toe i
ai se oti, po o se faanoanoa, po o se auē, e leai
foi se toe puapuagā.*

Sa ou taitaia ona sauniga faai i lona oliolisaga tumau
i lona aiga lava i Moataa, ma matou faamavae atu ai
i si o matou tinā penisione, i le Pese Faamavae a le
au-kerisiano, 'Talofa uso e, tofaina oe'. Ia manuia
lau malaga Rosa, faafetai le tausī Faifeau. Faafetai
mo a'oa'oga tāua mo i matou uma, ia fai lea ma
viiga o le Atua.

O la le Tusi Paia: "...se'i ta o ma a'u i lo'u fale, e
te malolo ai, ou te avatu foi ia te oe se meaalofa."
(1 Tupu 13:7).

Saunia susuga Semikueva Jimmy Ugapō

Faatoafe (FS).

Fa'afeagaiga EFKS Moata'a,

Matāgaluega VAIMAUGA.

TUSI MO SU'EGA ULUFALE I
MALUA, 2026

FEAGAIGA TUAI: **IOPU**

FEAGAIGA FOU: **KALATIA & EFESO**

ASO O SU'EGA: **ASO LUA, 11 AOKUSO
& ASO LULU, 12 AOKUSO**

O E UA FAI I LAGI LE FOLAUGA

AUGUST JR. LEE FS.

29/8/1965 – 14/10/2025

Na soifua mai le susuga i le Faafeagaiga i le Aso Faraile 29 o Aukuso 1965 i Tuasivi Savaii, a e na malii i le Aso Lua 14 Oketopa 2025 i Waipahu Hawaii. Ua atoa ai le 56 tausaga, 1 masina ma le 15 aso o lona soifua. O le Aso Sa 25 Setema 2022, na manumalo ai le Faifeau ma lona Faletua ia Aiga i le Filifiliga a Vaipuna o le Ola. O le Aso Toona'i 03 Tesema 2022, na osi ai la latou Feagaiga, ma avea ai i la'ua ma le Faletua ma Fa'afeagaiga a le Ekalesia a Vaipuna o le Ola. O le Aso Tofi 26 Ianuari 2023 na tofia aloa'ia ai e avea ma Failautusi o le Pulega Sasa'e.

O le Fono Tele 2023, na avea ai ma Usufono a Faifeau ma A'oa'o o le Matagaluega a Hawaii. Na ia saunia Tatalo o le Faigalotu o le Fono Tele, i le Aso Sa i le Fale o Tina, o Arnold Fautanu FS na faitauina le Tusi Paia, a o Galuefa Leilua FS na lauga ma ta'ita'i. O lana Lotu mulimuli faale-Pulega na ia ta'ita'ia ai le Lotu Au Taumafai Faafouina i le Aso Sa 05 Oketopa 2025. Ona soso'o lea ma le Aso Sa Lotu Tamaiti 12 Oketopa 2025, ona susū mai lea ma matou mafuta i le Aso Gafua na soso'o ai i le Su'ega a A'oa'o Fesoasoani. O tala lava o si a latou Lotu Tamaiti na ia talatala fiafia mai, ma le lilo i manatu o si a matou toe mafutaga lea ma le Susuga i le Faifeau.

O le vaveao na soso'o ai, poo le 5:30am o le Aso Lua 14 Oketopa 2025, ua faate'ia lava le mafaufau ina ua valaau mai le Faletua ia Aiga o la'ua o loo i le Falema'i, a ua malii le Faifeau. E le'i gasegase pe na tigaina ma mafatia, a e malii filemu lava i lo la maota. Na logo le Susuga i le Faifeau Toeaina ia Fuamaila Soa, ma matou feiloai ai i le West Oahu Queen's Hospital ma molimauina ai le uso a Faifeau ua faamanavaina e le Atua ana fe'au.

O ona Toe Sauniga i si ana Matagaluega i Hawaii, na faia lea i le Malumalu o le Maluapapa Honolulu EFKS i le Aso Lulu 22 Oketopa 2025 i le 10:00 taeao. Na muamua le Sauniga FaaleAiga (Family Service), na ta'ita'ia e le Susuga i le Faifeau Toeaina Penisione ia Iosefa Tui FTP. A o le Sauniga Tele na amata i le 11:00, na ta'ita'ia e le Susuga i le Faifeau

Toeaina ia Tinetali Gafa FT. O Peniamina Filiva'a FS na saunia Tatalo. O Galuefa Leilua FS na faitauina le Tusi Paia ma molimau mo le Pulega Sasa'e. O le A'oa'o Fesoasoani ia Anae Sanele AF na molimau mo le Aulotu a Vaipuna o le Ola. O le Faletua ia 'Oli na molimau mo Aiga o le Faifeau. Na molimau foi le Faletua loto faavauvau ia Aiga Lee e uiga i le la mafutaga. A o le Faifeau Toeaina ia Fuamaila Soa FT, na saunia le Lauga ma le Upu Faamafanafana. Ona soso'o ai lea ma le taumafataga ma fa'aalologa mo le Matagaluega ma le aofia na potopoto, na saunia lava e le Faletua ia Aiga ma le Aulotu a Vaipuna o le Ola.

O le Aso Tofi na soso'o ai 23 Oketopa 2025 i le 11:00 i le po, na momoli ai loa lona Tino Malii i lona Sa i Samoa. O le Susuga ia Letupu Fa'au'uga Mata'utia FS ma le Aulotu a Loimata o Apaula (O le Aulotu sa tautua ai August ma Aiga i Samoa), ma le mamalu i Aiga o le Faifeau ma lona Faletua na faatali mai i Faleolo, na saunia e Letupu le Tatalo ona momoli ai lea o lona Sa i le Fale Malii o Ligaliga i Leifiifi. Na faia ai se Sauniga Lotu na ta'ita'ia lava e le Susuga ia Letupu ma le Aulotu a Loimata o Apaula. Na soso'o lea ma le taumafataga ma tau'a'ao fo'i nai meaalofa tupe na saunia e le mamalu o Aiga. Ma taoto ai lona Tino Malii i le Fale Malii o Ligaliga e faatali ai ona sauniga faai'u.

O le Aso Lulu 29 Oketopa na faia ai ona Toe Sauniga i Samoa i le Malumalu o le Aulotu Loimata o Apaula EFKS. O le Sauniga FaaleAiga (Family Service) 8:00 – 11:00 taeao na ta'ita'ia e le Susuga ia Letupu. A o le Sauniga Tele, na ta'ita'ia e le Susuga ia Auvaa'a Peseta FT. O Molimau o le Sauniga; O le Sui o Aiga o le tuafafine o August ia Terisa, o le Sui o fanau o Orepā, o le Aulotu a Vaipuna o le Ola o Anae Sanele AF, o le Faletua ia Aiga Lee, o le Matagaluega a Hawaii o Galuefa Leilua FS, ma le Faifeau o le Aulotu a Loimata o Apaula ia Letupu Fa'au'uga Mata'utia FS. O Tatalo na saunia lea e Poasa To'ia FS. O le Susuga ia Fuamaila Soa FT na faitauina le Tusi Paia ma saunia le Upu Faamafanafana. Na saunua fa'aopoopo le Susuga i le Ta'ita'ia Auvaa Peseta FT ma faai'u ai Sauniga i le Malumalu. O le Falelauasiga o le Faifeau i lona Aiga i Papauta ma lagomau ai na ta'ita'ia e le Susuga ia Letupu Fa'au'uga Mata'utia FS, ma faamavae atu ai i le Pese – Talofa Uso e Tofaina Oe.

Na laualuga lava i molimau o le Faifeau ia August Lee FS upu o loo i le Mataio 24:46 – “*Amuia lea auauna, pe a sau lona Alii, e maua o ia o loo faapea ona fai – Blessed is that servant whom his Master when he comes will find so doing.*” O se tagata sa faamaoni i fe’au na valaauina i ai e lona Matai. O se auauna ua loa tausaga o faigaluega mo le Ekalesia Aoao a o le’i su’e mo Malua. O le 1992 na amata faigaluega ai i le Ofisa o Tupe a le Ekalesia mo le tele o tausaga. Na motusia mo ni nai tausaga lea auaunaga ina ua faigaluega mo le Computer Services Limited(CSL). Peita’i na avanoa loa le Pule o le Toomaga a le Ekalesia, e le i popole i le ese’esega o totogi, ae na ia toe fo’i mai ma galue mo le Ekalesia, aua ua ia manatua o le mana’o lava lea o si ona Tua’a Tina ia Peka Luamanu Lee, o le Ekalesia. Se’ia oo lava ina avea ma Tausitusi Sili (Chief Accountant) a le Ekalesia.

Ona su’e lea i Malua ma a’otauina ai 2010 - 2013. Na i’u ma le manuia, ma ua toe fo’i ane ma galue o le Pule o le Faletusi (Ia Malamalama Bookshop) & Fale Lomitusi (Malua Printing Press). Na amata lana galuega i le taimi faaletonu o ia Atina’e a le Ekalesia i tulaga tau tupe. A o lona faamaoni ma le filifiliga, ma lona alofa i le Ekalesia, aemaise o lona Alii ua valaauina o ia, na toe faaleleia uma ai nei Atina’e. O se tasi o Galuega Tele na feagai ma le Faifeau, o le toe lolomiina lea o le Tusi Failotu – “Ia Viia Lou Suafa”, ma fa’aaogaina ai le pepa o loo lolomiina ai le Tusi Paia ma lona fa’ava’a lanu mūmū manaia. E le’i leva, ae vala’auina loa i le Galuega Faifeau Tausinuu lea ua valaau mai lona Matai, o loo punoua’i ai. Tau ina ia fai ma Viiga o le Alii o le Ao o le Ekalesia lou Soifua auauna Rev. August Lee.

Fai mai le Aposetolo o Paulo i le Roma 14:7-8 “*Aua e leai so tatou e ola mo ia lava, e le oti fo’i se tasi mo ia lava; aua afai tatou te ola, tatou te ola mo le Alii, pe afai e oti, e oti mo le Alii; o lenei, pe ola pe oti i tatou, o tagata lava o le Alii i tatou.*” Ia saga faamafanafanaina pea le Faletua ia Aiga ma le nofoaalo e le Agaga o le Alii. Ia manuia lau malaga Uso.

Saunia susuga Galuefa Leilua FS,
Failautusi Matagaluega
MATAGALUEGA HAWAII.

TUIMAVAVE TAFAGAMANU

ENELIKO MASOE

O le afioga i le sa’o aumaga ia Tuimavave Tafagamanu Eneliko Masoe o le tagata ekalesia, o le EFKS Ululoloa ma Siusega. Na soifua a’e i lona aiga i Lepea i le Aso Faraile, 26 Aokuso 1960, a e na maliu i le Aso Faraile, 26 Setema 2025; ua atoa ai le 65 tausaga ma le 1 masina o lona soifua. Na faaipoipo atu i le tina ia Faimafili Masoe mai Iva, Savaii i le Aso 24 Me 2008. Na faaipoipo i la’ua e le susuga ia Siosifa Fakaumunua Mafi FS, o le faafeagaiga o le EFKS Ululoloa ma Siusega nei (ua maliu). E toaono o la alo, e toatolu (3) tama’ita’i, a e toatolu (3) foi alii. Ua toavalu (8) fanau a fanau; o lona uiga, e toasefulu ma le toafa (14) i latou ua faamanuiaina ai i la’ua e le Atua. O se tamā sa galue o se avetaavale la’u uta mamafa (*heavy truck driver*) i nisi o kamupani fai konekarate i le fausiaina o auala ma fale. O se tagata sa galue malosia ona o le tausiga o fanau i a’oa’oga sa feagai ai.

I molimau a o la aiga ma paolo na auai i lea aso, o se tamā e tautua ma osiosi aiga. E le gata o aiga o ona tua’ā, a o aiga foi o si ana fanau. O lana tautua foi sa punoua’i ai auā le tausina o le Maota i Lepea e afio ai le Tupufia, le Faumuina, afifio ai Usoalii ma Tamapa’a, alalata’i ai Tauaitu ma le Saofaiga ma atua. Sa ta’ua foi o se tamā e talenia i le taina o le kitara ma pese. A e i ai foi lona tomai faakuka, mo le gasecina o taumafa. E ui o le tele o taimi sa lē mafai ona auai mai ai i tapuaiga faitele, ona sa tua i gasegase; a o se aiga e tautua lotu. E leai se atina’e a le Ekalesia e pa’ū i le soifua auauna.

A o le uiga lea o upu a le aposetolo o Paulo ia Roma; e pei ona ‘au’au i ai Toe Sauniga o le tamā: “*Auā e leai so tatou e ola mo ia lava, e le oti foi se tasi mo ia lava; auā afai tatou te ola, tatou te ola mo le Alii, pe afai e oti, e oti mo le Alii; o lenei, pe ola pe oti i tatou, o tagata lava o le Alii i tatou...*” Roma 14. O le faamoemoe ina ia ta’uaogaina le soifua mo le Alii; i soo se vaega o lana Talalelei e au i ai se auaunaga. O le itula e 10am o le Aso Tofi, 9 Oketopa 2025, na faia ai ona toe sauniga faai’u i le malumalu o le EFKS Ululoloa ma Siusega, ma lagomau ai i lona aiga i Ululoloa. Sa ou taitaia le sauniga, a o le susuga ia Faitoga Tolua FS (Faifeau Nofoaiga EFKS Ululoloa ma Siusega), na faaulufaleina lona sa i le malumalu ma fofogaina talosaga o le tapuaiga. Tofa Soifua Tafagamanu.

Saunia susuga Kirisimasi Sani FS,
EFKS Ululoloa ma Siusega,
MATAGALUEGA FALEATA

SUSUGA AUKUSO JUNIOR LEE FS




TUIMAVAVE TAFAGAMANU

ENELIKO MASOE



ROSA ELETISE SULUVALE



AU FAAU'U, MALUA 2025

(BACHELOR OF THEOLOGY)

15. A'oa'o: Pouoa Toa, 40
Nuu: Mutiatele, Saanapu
Faletua: Olotauatia Toa,
Nuu: Falefa
MATAGALUEGA: LOTOFAGAL. ALEIPATA

16. A'oa'o: Sapati Sapati, 40
Nuu: Savaia, Tafagamanu, Falelima,
Matautu Falelatai
Faletua: Sandra Olita Sapati, 41
Nuu: Falevao
MATAGALUEGA: AANA

AU FAAU'U MALUA 2025

17. A'oa'o: Taviuni Salele, 31
Nuu: Fusi Safotulafai, Sapapalii, Manono-tai
Faletua: Mafa'i Salele, 30
Nuu: Fasitoo-tai, Satapuala, Nofoalii, Auala
MATAGALUEGA: FAASALELEAGA

18. A'oa'o: Tui Paulo, 28
Nuu: Atafu Tokelau
Faletua: Mavaega Paulo, 33
Nuu: Atafu
MATAGALUEGA: EFKT

19. A'oa'o: Viliamu Sialeipata Viliamu, 36
Nuu: Vaivase-uta, Vaiala, Apia, Asaga,
Fusi Safotulafai, Asaga, Sapapalii, Fagamalo
MATAGALUEGA: VAIMAUGA

MASTER OF THEOLOGY (DISTINCTION)

1. Makesi & Lauoi Aiva
2. Rev. Richard & Imoasina Noaese
3. Rev. Laupama & Vaitoomuli Alaovae Solomona
4. Rev. Terurunga Toaba
5. Rev. Perenise & Faalua Malota
6. Misioka & Rossana Tanielu
7. Caesar & Norah Utufua
8. Spencer & Faafou Eeseese Leuta
9. Rev. Uila & Telesa Koliata

(O le a lomia i le Sulu Samoa Tesema 2025, i latou
na faauu i le Faailoga **MASTER OF THEOLOGY**)

16. O LE SULU SAMOA NOVEMA 2025